

МЕСЯЦА МАРТА В 7-Й ДЕНЬ.

СВЯТЫХ СВЯЩЕННОМУЧЕНИК, В ХЕРСОНЕ ЕПИСКОПСТВОВАВШИХ, ВАСИЛИЯ, ЕФРЕМА, КАПИТОНА, ЕВГЕНИЯ, ЕФЕРИЯ И ПРОЧИХ

На Господи, возвах: стихиры, глас 4.

Подобен: Дал еси знамение:

Мученицы непобедимии, * и иерарси всехвальнии, * и светильницы всемирнии, * столпи непревратнии Божественныя Церкве, * и степень догматов, * и наставницы благочестивых, * и потребителие лести бысте, отцы небомудреннии, * световодителие душ наших, * Ангелов сообщницы, * Троицы поборницы.

Ефрем славный, * и Василий Богомудрый, * и Капитон великий, * Божественный Агафодор * со Елпидием, и Еферием, * и Евгением славным * словеса Божественными да ублажатся, * преподобне бо поживше и свящленно пострадавше, * Царствия явишася Небеснаго жителие.

Умертвив мудрование плотское подвиги, * Василий славный мертвеца воскреси * призыванием Божественным; * Капитон же паки, священнейший пастырь, * посреди пламене стоя, радуясь, * виден бысть неопалимь. * Тех молитвами, Человеколюбче, * умилостивление нам даруй * и велию Твою милость.

Слава, и ныне, Богородичен, глас и подобен тойже:

Скверну отмый страстнаго сердца моего, * Богородице Всепетая, * и вся язвы и гноения сего, * яже от греха, очисти, Чистая, * и ума моего устави непостояние, * яко да силу Твою и великое заступление * величаю, окаанный * и непотребный раб Твой.

Крестобогородичен. Подобен тойже:

Распинаема Христа Человеколюбца * видящи Пречистая * и ребра ископаваема копием, * плачуци, вопияше: * что сие, Сыне Мой? * Что Ти безблагодатнии людие воздаша, * за яже сотворил еси добрая им? * И тщишия безчадствовати Мя, Вселюбезнейший. * Удивляюся, Благоутробне, * Твоему вольному распятию.

НА УТРЕНИ

Канон, егоже краегранесие: Седмочисленный пастырей лик почитаю. Глас 4.

Песнь 1

Ирмос: Моря чермную пучину * невлажными стопами * древний пешествовав Израиль, * крестообразныма Моисеовыма рукама * Амаликову силу в пустыни победил есть.

Божественными светолитии мученицы облистаемы, светоносный сей и светлый праздник ваш всегда благочестно хвалящая страстей мглы избавите.

Слово Божие, воплощся, вас показа, всеблагославныя пастыри, Того возвестити Божество заблуждшим, преподобнии, и неведением бедствующим.

Вод животворных Духа исполняеми, истаявшия зноем лютым безбожия напоисте и к воде, славнии, спасения настависте.

Богородичен: Разрешися праотцев, Чистая, запрещение, паче ума Рождеством Твоим, Пречистая, и первый восприяша рая вход, велегласно восхваляюще Тя.

Песнь 3

Ирмос: Веселится о Тебе Церковь Твоя, Христе, зовущи: * Ты моя крепость, Господи, * и прибежище, и утверждение.

Огнем Божественным ум разжег, Василие всемудре, якоже пастырь изряднейший, вещь безбожия попалил еси.

Духа светом сущия во тьме лютых, славне, к просвещению привлекл еси святого крещения.

Стези твоя к Богу исправишася, Василие, вся от прелестнаго пути благодатию к Богоразумию обратиша.

Богородичен: Избавляющаго человеки от насилия вражия, родила еси сильного Господа, Пречистая Дево Всепетая.

Седален, глас 3.

Подобен: Красоте девства:

Миром помазания освятившеся, * пастырие явистеся людем Богомудрым, * и, яко агнцы чисти, пожершеся, принесостеся Слову Началопастырю, * пожершемуся, яко овчати, * мученицы всехвальнии и светильницы всемирнии. * Темже торжествуем вси любовию Божественную память вашу.

Слава, и ныне, Богородичен:

Яко невозделанная, Дево, лоза, * краснейший Грозд прозябла еси, источающ нам вино спасения, * всех веселящее души же и телеса. * Темже, яко вину Тя добрых блажаще присно, со Ангелом вопием Ти: * радуйся, Благодатная.

Крестобогородичен:

Неискусобрачная Чистая и Мати Твоя, Христе, * видящи Тя мертва висяща на Кресте, матерски плачущи, глаголаше: * что Тебе воздаде еврейский беззаконный собор и неблагодарный, * иже многих и великих Твоих, Сыне Мой, даров насладивыйся? * Пою Твое Божественное низхождение.

Песнь 4

Ирмос: Вознесена Тя видевши Церковь на Кресте, * Солнце праведное, * ста в чине своем, * достойно взывающи: * слава силе Твоей, Господи.

Священнейших мученик лик да поется, священства благодатию и мучения озаряемь, и поет, веселяся: слава силе Твоей, Господи.

Богоноснии кормчии Церкви, Ефрем и Агафодор, Василий и Капитон, Еферий, Евгений и Божественный Елпидий, Духом Святым явишася.

Научившеся Божественным, отцы Божественнии, люди в преподобии и правде истинно упасосте и конец блаженный мучением приясте.

Умершши неверием умершаго востанием получиша жизнь вечную, тобою веровавше Христу Богу нашему, мучениче священнейший Василие.

Богородичен: Умерщвленная оживила еси человеки, Жизнь Ипостасную рождши, Дево, паче всякия мысли, Христа, Бога нашего, Человека за милосердие бывша.

Песнь 5

Ирмос: Ты, Господи, мой Свет, * в мир пришел еси, * Свет Святый, обращаая из мрачна неведения * верою воспевающия Тя.

Чашу честнаго мучения исписте, Имя Господне, Богоноснии отцы, верно призывающе.

Един, мертвым вдыхаяй воскресение, молитвою твоею умершаго, Василие, воздвизает, уясняя твое проповедание.

Равночестна Отцу Сына проповедающе, многобожное мучительство идолонеистовства, отцы, отгнасте.

Богородичен: Блажени суть людие, ведущии Тя, Всенепорочная, Владыки всех Матерь и любовию ублажающии Тя.

Песнь 6

Ирмос: Пожру Ти со гласом хваления, Господи, * Церковь вопиет Ти, * от бесовския крове очищшися * ради милости от ребр Твоих * истекшею кровию.

Похвалами Агафодора же, и Евгения, и Василия великаго, и мудраго Елпидия увенчаем, иерархи и добляя сущия мученики.

Законными воспитании духа, всемудрии, беззаконнующим законы спасительныя предложивше, благочестия к просвещению тья привлекосте.

Явистеся от различных град овчата, единех же людей пастырие и Божественнаго града наследницы, в немже обитают Богу угодившии мученицы.

Богородичен: Закона Тя сени, пророков же гадания проображаху, Дево, неизреченным словом Рождество имевшую, спасающее мир, Всенепорочная.

Кондак, глас 2.

Подобен: В вышних живый:

Светоносный день наста * пастырей, епископствовавших светло в Херсоне, * ихже воспеваем праздник, * пострадавших за Христовы овцы. * Священномученицы, молитве Пастыреначальника Христа * и нас причести деснаго овец стояния, * да воишем вам: * радуйтеся, священнии отцы, * за Христа кровь свою изливавшии.

Песнь 7

Ирмос: В печи авраамстии отроцы персидстей, * любовию благочестия паче, * нежели пламенем, опаляеми, взываху: * благословен еси в храме славы Твоя, Господи.

Радуясь, вшел еси, отче Капитоне, в пещь, пребыл же еси неопалим, якоже отроцы трие, неверныя изымая огня будущаго, веровавшия Божественным твоим чудесем.

Не утрашився, не убоявся повеления, отче священный Капитоне, в священную ризу облекся еси, в нейже угле огненное нося, блаженне.

Путь заградил еси неразумия Божественными словесы твоими, разум благочестия всем вложив, во глубину поползшимся идолонеиствия, священнодетелю Капитоне Богоприятне.

Богородичен: Создавый рукою Еву, Слово Божие, Отроковице, наздати вся восхотев, из чрева Твоего зиждется, начало приема, Отцу и Духу сопредельный.

Песнь 8

Ирмос: Руце распростер, Даниил * львов зияния в рове затче; * огненную же силу угасиша, * добродетелию препоясавшися, * благочестия рачители отроцы, взывающе: * благословите, вся дела Господня, Господа.

Умртивше болезнми плоть, жизнь безсмертную исходатаисте, отцы преподобнии, всем, мертвым богом служащим, иже и, спасшися, с вами присно зовут: благословите, вся дела Господня, Господа.

Согласно Евгения, вернии, и Агафодора, Ефрема и Елпидия с Еферием воспоим, Василия же и Капитона, яко низложители врага и иерархи Христовы, Емуже вопием: вся дела, благословите Господня Господа.

Возвеселил еси люди, отче Ефреме, твоими ученьми и ныне прешел еси к не вечернему сиянию и к веселию присносущному, твоих трудов воздаяния приема и взывая: вся дела, благословите Господня Господа.

Пожив, всеблаженне Василие, на земли, яко Ангел, над страстьми плотскими ты царствовал еси благодатию и прешел еси к Царством Небесным, Христу Царю предстоя и взывая: благословите, вся дела Господня, Господа.

Богородичен: Виден бысть яко человек из Тебе раждаемь Пресущественный, сугуб естеством, Пречистая, действы, и хотении, имже уподобися, изволив являясь, Емуже вопием: вся дела, благословите Господня Господа.

Песнь 9

Ирмос: Камень нерукосечный * от несекомья горы, Тебе, Дево, * краугольный отсечся, * Христос, совокупивый разстоящая естества. * Тем веселящися, Тя, Богородице, величаем.

Священномучеников святых священную совершающе память, песньми священными, приидите вси, велегласно тех почтим, о нас молящихся Всецелому Богу нашему.

Явистесь, яко честное камение, по земли от безбожных, мученицы, влачими, Божественнии, и прелести утверждения силою Божиею сокрушающе: сего ради достойно ублажаетесь.

Днесь град Херсон вашу память празднует: сему бо явистесь столпи, и Божественна забрала, и утверждения, пастырие, и учителяе, и молитвенницы, Богоблаженнии.

Уже ликом Ангельским лик отец сочислися: со Евгением Ефрем и Капитон, Елпидий же и Еферий, и Василий славный, и Богомудрый Агафодор.

Богородичен: Носящи Христа на объятиих, рукою носящаго вся, Богоблагодатная Отроковица, дивящися, вопияше, глаголющи: како и Сына познаваю Тя и Творца Моего непостижимаго?